



PRIMEIRO MINISTRO

**DISKURSU SUA ESELÉNSIA PRIMEIRU-MINISTRU
REPÚBLIKA DEMOKRÁTIKA TIMOR-LESTE,
DR. RUI MARIA DE ARAÚJO,
IHA BIBAN ASINATURA AKORDU KUADRU NO AKORDU ANUÁL DE
SUBVENSAUN
ENTRE GOVERNUN REPÚBLIKA DEMOKRÁTIKA TIMOR-LESTE
NO KONFERÉNSIA EPISKOPAL TIMORENSE**

**Ministériu Negósius Estranjeirus no Kooperasaun
16 juñu 2017**

Sua Eselénsia Reverendíssima, Dom Basílio do Nascimento, Bispu Baucau no Prezidente Konferénsia Episkopal Timorensé

Sua Eselénsia Reverendíssima, Bispu Dom Virgílio do Carmo, Bispu Díli

Kolega membru Governu sira

Sua Eselénsia, Monseñor Mario Codamo, Encarregadu Negósius Embaixada Vaticano iha Timor-Leste

Reverendíssimu Padre sira no Reverenda Madre sira

Exmos. Señor Diretor Jerál sira, Diretor Nasionál no Xefe Departamentu sira

Señora no señor sira,
Ilustre konvidadu sira,

Hafoin Parlamentu Nasionál kumpre tiha prosedimentu hirak ratifikasaun nian, iha 2015, kona-ba Akordu entre Repúblika Demokrátika Timor-Leste no Santa Sé, ne'ebé ha'u rasik entrega ho liman ba Amo Papa Francisco iha ha'u nia vizita ofisiál ba Vaticano iha 2016, maka ho ksolok boot ohin ha'u asina, hodi reprezenta Governu, Akordu Kuadru no Akordu Anuál Subvensaun nian entre Governu Timor-Leste no Konferénsia Episkopal Timorensé, ne'ebé maka reprezenta hosi ninia ilustre Prezidente, Sua Eselénsia Reverendíssima Dom Basílio do Nascimento.

Akordu Kuadru ne'ebé oras ne'e estabese ona hakarak define, ho forma klaru, regra hirak jerál ne'ebé maka sei hatudu dalan ba parseria entre Estadu no Kreda Katólíka, hodi identifika, hanesan, área hirak finansiametu nian no ninia repartisaun iha verba sira. Hodi konsidera papel fundamentál ne'ebé Kreda Katólíka kaer iha ita nia país iha nível edukasaun no iha luta hasoru pobreza, área hirak intervensaun xave ba dezvoltamentu no ba hamenus desigualdade no eskluzaun sosiál, ne'ebé iha Akordu ne'e prevee katak pelumenu 75% hosi kontribuisaun Estadu nian liu hosi Konferénsia Episkopal bele kanaliza ba atividade sira iha área hirak ne'e, hanesan 50% ba atividade sira iha área edukativa no 25% iha área sosiál, hodi 25% hirak seluk ba atividade governu ekleziástiku no jestaun ba verba hirak fo ona.

Nune'e maka Akordu Kuadru ida ne'e hanesan pasu fundamentál ida tan iha konsolidasaun relasaun entre ita nia Estadu ho Santa Sé no hosi ohin ba oin sei hanesan baze ba akordu hirak kona-ba subvensaun ne'ebé Governu sei tinan-tinan halo ho Konferénsia Episkopal Timorensé. Tan ba ne'e maka ita asina tiha ona mos Akordu Subvensaun Anuál ba 2017, ne'ebé prevee finansiametu ida liu hosi Orsamentu Jerál Estadu.

Señora no señor sira,
Ilustre konvidadu sira

Instrumentu hirak ne'ebé agora estabese ona ne'e, naturalmente importante iha kuadru relasaun hirak formál entre Estadu sira no instituisaun sira, no relasaun hirak ne'e reprezenta iha realidade buat barak liu ba povu Timor. Sai nu'udar rekoñesimentu kona-ba saída maka Kreda Katólíka signífika iha sosiedade nia laran, iha ninia valór no ninia fiar sira, no sai mos hanesan rekoñese ninia papél determinante iha luta ba independénsia Timor-Leste nian no iha prosesu konstrusaun ita nia identidade. Tanba razaun hirak labele kestiona ne'e, maka ita bele hetan iha Kreda Katólíka parseiru fundamentál Estadu nian ida ne'ebé apoia ona ita no kontinua apoia iha konstrusaun sosiedade ida umanista, fraterna no solidáriu.

Kreda Katólíka, iha Reverendíssimu Padre sira no Reverenda Madre sira nia hahalok, nia iha importánsia boot ida iha populasau nia let no dala barak nia prezente hodi apoia buat ne'ebé Estadu seidak bele to'o iha neba, liu hosi prestasaun servisu báziku hirak esensiál ba ita nia populasau nia moris ida dignu. Ida ne'e mos maka sai razaun ida ba intervensaun Kreda Katólíka nian iha área hirak sentráliu hanesan edukasaun no protesaun sosiál. Dezenvolvimentu umanu, iha área hirak dook iha ita nia país, la'o duni tanba intervensaun abnegada no komprometida ho vida no dignidade mane no feto sira nian iha Kreda Katólíka. No, tanba ne'e, maka ida ne'e hanesan servisu ida Estadu rekoñese no merese ninia apoiu iha kuadru kooperasaun institusionál nian ida ne'ebé formál.

Señora no señor sira,
Ilustre konvidadu sira

Atu remata ha'u nia intervensaun badak ida ne'e, ha'u hakarak aproveita oportunidade atu espresa ha'u nia admirasaun no ha'u nia agradesimentu pesoál ba Reverendíssimu Padre sira no Reverenda Madre sira (barak maka prezente iha ne'e) no atu loron-loron iha sira nia vida sira bele dedika sira nia tempu, sira nia domin no sira nia esperansa ba labarik, klosan-fetoran, feto no mane sira iha país ida ne'e. Bele iha ensinu ka iha saúde, iha arte no ofísiu sira, iha agrikultura no atividade ekonómika hirak seluk, ka iha ninia misaun boot liu kona-ba apoiu espirituál, liu hosi ita boot sira nia apoiu maka obra barak no koñesimentu barak hetok sai buras hodi serbi ba evolusaun sosiál ita nia povu nian. Servisu ida ne'e no legadu ida ne'e forja, loron ba loron, valór hirak kona-ba respeito no solidariedade ita nia sosiedade nian.

No iha remata mandatu, mos hodi Governu Konstitusionál da-VI nian, ha'u hakarak agradese kolaborasaun ne'ebé maka'as no apoiu Kreda Katólíka nian ne'ebé iha implementa ninia atividade sira kontribui ona barak tebes ati ita bele hetan ita nia

objektivu hirak komún relasiona ho prosperidade, justisa, dame no armonia ne'ebé ita aspira ba Timor-Leste.

Ha'u fiar katak valorizasaun no rekoñesimentu ba pasadu, servisu ho empenhu iha prezente no kontínuu esforsu kooperasaun ho Kreda Katólíka iha futuru bele sai dalan ba, hamutuk bele kontribui ba misaun noble atu lori dignidade no beinstár ba sidadaun hirak hotu ne'ebé iha direitu.

Obrigadu wa'in.

Díli, 16 juñu 2017

Dr. Rui Maria de Araújo